



2024/1011

3.4.2024

CINNEADH (AE) 2024/1011 ÓN gCOMHAIRLE

an 25 Márta 2024

maidir leis an seasamh atá le glacadh thar ceann an Aontais i gCoiste GNSS AE/ASECNA, arna bhunú faoin gComhaontú Comhair idir an tAontas Eorpach agus an Ghníomhaireacht um Shábháilteacht na hAerloingseoireachta san Afraic agus i Madagascar (ASECNA) maidir le forbairt na loingseoireachta satailíte agus soláthar seirbhísí gaolmhara i réimse inniúlachta ASECNA ar mhaithe leis an eitleocht shibhialta, a mhéid a bhaineann le Rialacha Nós Imeachta an Choiste sin a ghlacadh

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 189 , i gcomhar le hAirteagal 218(9) de,

Ag féachaint don togra ón gCoimisiún Eorpach,

De bharr an mhéid seo a leanas:

- (1) Tugadh i gcrích an Comhaontú Comhair idir an tAontas Eorpach agus an Ghníomhaireacht um Shábháilteacht na hAerloingseoireachta san Afraic agus i Madagascar (ASECNA) maidir le forbairt na loingseoireachta satailíte agus soláthar seirbhísí gaolmhara i réimse inniúlachta ASECNA ar mhaithe leis an eitleocht shibhialta ⁽¹⁾ ('an Comhaontú') de bhun Chinneadh (AE) 2018/1603 ón gComhairle ⁽²⁾, agus tháinig sé i bhfeidhm an 1 Samhain 2018.
- (2) Le hAirteagal 29 den Chomhaontú, bunaítear Comhchoiste, dá ngairtear 'Coiste GNSS AE/ASECNA' ('an Comhchoiste'), agus foráiltear leis go mbunóidh an Comhchoiste a rialacha nós imeachta, lena n-áirítear, i measc forálacha eile, na socrúithe chun a chuid cruinnithe a thionól, cathaoirleach a cheapadh, sainordú an chathaoirleach agus teagmhálacha idir na páirtithe a shainiú.
- (3) Is iomchuí an seasamh atá le glacadh thar ceann an Aontais sa Chomhchoiste a mhéid a bhaineann le Rialacha Nós Imeachta an Chomhchoiste a ghlacadh a bhunú, ós rud é go mbeidh éifeachtaí dlíthiúla san Aontas ag an gcinneadh maidir lena nglacadh.
- (4) Ba cheart seasamh an Aontais sa Chomhchoiste a bheith bunaithe ar an dréachtchinneadh atá i gceangal leis seo,

TAR ÉIS AN CINNEADH SEO A GHLACADH:

Airteagal 1

1. Maidir leis an seasamh atá le glacadh ag an Aontas i gCoiste GNSS AE/ASECNA arna bhunú leis an gComhaontú Comhair idir an tAontas Eorpach agus an Ghníomhaireacht um Shábháilteacht na hAerloingseoireachta san Afraic agus i Madagascar (ASECNA) maidir le forbairt na loingseoireachta satailíte agus soláthar seirbhísí gaolmhara i réimse inniúlachta ASECNA ar mhaithe leis an eitleocht shibhialta ('an Chomhchoiste') a mhéid a bhaineann le rialacha nós imeachta an Chomhchoiste sin a ghlacadh, beidh sé bunaithe ar an Dréachtchinneadh atá i gceangal leis an gCinneadh seo.

2. Ní fhéadfaidh ionadaithe an Aontais sa Chomhchoiste ach mionathruithe ar an Dréachtchinneadh a ghlacadh gan cinneadh eile ón gComhairle.

Airteagal 2

Tiocfaidh an Cinneadh seo i bhfeidhm ar dháta a ghlactha.

⁽¹⁾ IO L 268, 26.10.2018, lch. 3.

⁽²⁾ Cinneadh (AE) 2018/1603 ón gComhairle an 18 Meán Fómhair 2018 maidir le tabhairt i gcrích, thar ceann an Aontais, an Chomhaontaithe Comhair idir an tAontas Eorpach agus an Ghníomhaireacht um Shábháilteacht Aerloingseoireachta san Afraic agus i Madagascar (ASECNA) i ndáil le forbairt na loingseoireachta satailíte agus soláthar seirbhísí gaolmhara i réimse inniúlachta ASECNA chun leasa na heitleochta sibhialta (IO L 268, 26.10.2018, lch. 1).

Arna dhéanamh sa Bhruiséil, an 25 Márta 2024.

Thar ceann na Comhairle
An tUachtarán
A. MARON

DRÉACHT
CINNEADH Uimh. 1/2024 Ó CHOISTE GNSS AE/ASECNA
an ...
lena ndéantar a Rialacha Nós Imeachta a ghlacadh

TÁ COISTE GNSS AE/ASECNA,

Ag féachaint don Chomhaontú Comhair idir an tAontas Eorpach agus an Ghníomhaireacht um Shábháilteacht na hAerloingseoireachta san Afraic agus i Madagascar (ASECNA) maidir le forbairt na loingseoireachta satailíte agus soláthar seirbhísí gaolmhara i réimse inniúlachta ASECNA ar mhaithe leis an eitlíocht shibhialta, agus go háirithe Airteagal 29 de,

De bharr an mhéid seo a leanas:

- (1) Síníodh an Comhaontú Comhair idir an tAontas Eorpach agus an Ghníomhaireacht um Shábháilteacht Aerloingseoireachta san Afraic agus i Madagascar (ASECNA) maidir le forbairt na loingseoireachta satailíte agus soláthar seirbhísí gaolmhara i réimse inniúlachta ASECNA ar mhaithe leis an eitlíocht shibhialta ⁽¹⁾ sa Bhruiséil an 5 Nollaig 2016 agus tháinig sé i bhfeidhm an 1 Samhain 2018.
- (2) De bhun Airteagal 29(2) den Chomhaontú, bunaítear Coiste GNSS AE/ASECNA ('an Comhchoiste'), a Rialacha Nós Imeachta féin.
- (3) I gcomhréir le hAirteagal 29(4) den Chomhaontú, féadfaidh an Comhchoiste a chinneadh aon mheitheal nó aon ghrúpa saineolaithe a bhunú a mheasann sé a bheith iomchuí chun cabhrú leis a chúraimí a chur i gcrích.
- (4) I gcomhréir le hAirteagal 29(1) den Chomhaontú, beidh an Comhchoiste comhdhéanta d'ionadaithe ó ASECNA agus d'ionadaithe ón Aontas Eorpach,

TAR ÉIS AN CINNEADH SEO A GHLACADH:

Airteagal 1

Glactar leis seo Rialacha Nós Imeachta an Chomhchoiste a leagtar amach san Iarscríbhinn a ghabhann leis an gCinneadh seo.

Airteagal 2

Tiocfaidh an Cinneadh seo i bhfeidhm ar lá a ghlactha.

Arna dhéanamh as Fraincis sa Bhruiséil an ... 2024 agus i nDacár an ... 2024.

	<i>Thar ceann an Chomhchoiste</i>	
<i>An cathaoirleach</i>	<i>An rúnaí don Aontas Eorpach</i>	<i>An rúnaí do ASECNA</i>

⁽¹⁾ IO AE L 268, 26.10.2018, lch. 3.

IARSCRÍBHINN

RIALACHA NÓS IMEACHTA CHOISTE GNSS AE/ASECNA

Airteagal 1

Raon feidhme

Leagfar síos leis na rialacha nós imeachta seo rialacha oibríochtúla maidir le Coiste GNSS AE/ASECNA ('an Comhchoiste') arna bhunú le hAirteagal 29(1) den Chomhaontú Comhair idir an tAontas Eorpach agus an Gníomhaireacht um Shábháilteacht na hAerloingseoireachta san Afraic agus i Madagascár maidir le forbairt na loingseoireachta satailíte agus soláthar seirbhísí gaolmhara i réimse inniúlachta ASECNA ar mhaithe leis an eitleocht shibhialta ('an Comhaontú'), a síníodh sa Bhruiséil an 5 Nollaig 2016, agus a tháinig i bhfeidhm an 1 Samhain 2018.

Airteagal 2

Comhdhéanamh an Chomhchoiste

1. Beidh an Comhchoiste comhdhéanta, de pháirt, i gcás an Aontais Eorpaigh, d'ionadaitheón gCoimisiún Eorpach ('an Coimisiún') agus, de pháirt eile, d'ionadaitheón nGníomhaireacht um Shábháilteacht na hAerloingseoireachta san Afraic agus i Madagascár ('ASECNA').
2. Féadfaidh ionadaithe a ghníomhaíonn thar ceann na bpáirtithe a bheith in éineacht le toscairí na bpáirtithe mar gheall ar a scileanna sonracha.

Airteagal 3

Cathaoirleacht

1. Beidh cathaoirleacht an Chomhchoiste ag gach páirtí ar feadh tréimhse bliana féilire amháin ar bhonn idirmhalartach.
2. Gníomhóidh ASECNA mar chathaoirleach le linn na bliana féilire ina dtiocfaidh an Comhaontú i bhfeidhm.
3. Ceapfaidh an páirtí a mbeidh an chathaoirleacht aige cathaoirleach an Chomhchoiste agus a ionadaí nó a hionadaí.
4. Stiúrfaidh an cathaoirleach obair an Chomhchoiste.

Airteagal 4

Breathnóirí

Féadfaidh an Comhchoiste a chinneadh, de chomhthoil na bpáirtithe, iarraidh ar dhaoine ina gcáil mar shaineolaithe nó mar ionadaithe comhlachtaí eile freastal ar chruinnithe an Chomhchoiste mar bhreathnóirí chun faisnéis a sholáthar faoi ábhair shonracha. Leagfaidh an Comhchoiste amach na téarmaí agus na coinníollacha faoina bhféadfaidh breathnóirí mar sin freastal ar na cruinnithe. Ní rannchuideoidh daoine a n-iarrfaidh an Coiste orthu ina gcáil mar shaineolaithe nó mar bhreathnóirí le cinntí agus moltaí a ghlacadh ag cruinnithe an Chomhchoiste.

Airteagal 5

An Rúnaíocht

1. Gníomhóidh oifigeach de chuid an Choimisiúin agus oifigeach de chuid ASECNA go comhpháirteach mar Rúnaithe an Chomhchoiste.
2. Beidh Rúnaíocht an Chomhchoiste freagrach as an gcumarsáid idir na páirtithe, lena n-áirítear doiciméid a tharchur.
3. Tagann feidhmeanna na rúnaíochta faoi fhreagracht an pháirtí a bhfuil an chathaoirleacht aige.

*Airteagal 6***Cruinnithe den Chomhchoiste**

1. Tiocfaidh an Comhchoiste le chéile de réir mar is gá agus uair amháin sa bhliain, i bprionsabal.

Déanfaidh an cathaoirleach, tar éis dul i gcomhairle leis na páirtithe, cruinniú an Chomhchoiste a thionól in am agus in áit a chomhaontófar go frithpháirteach. Má chomhaontaíonn na páirtithe amhlaidh, féadfar comhdhálacha teileafóin agus físchomhdhálacha a réachtáil freisin.

Tionólfaidh an Cathaoirleach cruinniú urghnách den Chomhchoiste arna iarraidh sin don Aontas Eorpach nó do ASECNA.

Tiocfaidh an Comhchoiste le chéile laistigh de 15 lá féilire tar éis iarraidh den sórt sin a fháil faoi Airteagal 29(3) den Chomhaontú.

2. Tiocfaidh an Comhchoiste le chéile sa Bhruiséil nó i nDacár, ag brath ar an bpáirtí a bhfuil an chathaoirleacht aige, mura gcomhaontóidh na páirtithe a mhalairt.
3. Seolfaidh an Cathaoirleach an fógra faoin gcruinniú, mar aon leis an dréachtchlár oibre agus na doiciméid don chruinniú, chuig ionadaithe na bpáirtithe 21 lá féilire ar a laghad roimh an gcruinniú. Déanfar doiciméid le haghaidh cruinnithe arna dtionól i gcomhréir le hAirteagal 29(3) den Chomhaontú a sheoladh tráth nach déanaí ná 7 lá féilire roimh an gcruinniú.
4. Féadfaidh an cathaoirleach, i gcomhaontú leis na páirtithe, na teorainneacha ama a luaitear i mír 3 a ghiorrú chun ceanglais ábhair ar leith a chur san áireamh.
5. Cuirfear comhdhéanamh thoscaireacht gach páirtí in iúl don chathaoirleach 7 lá féilire ar a laghad roimh gach cruinniú.
6. Ní cruinnithe poiblí a bheidh i gcruinnithe an Chomhchoiste, mura gcinnfidh na páirtithe a mhalairt.

*Airteagal 7***Clár oibre**

1. Déanfaidh an cathaoirleach, le cúnaimh ó na Rúnaithe, an clár oibre sealadach le haghaidh gach cruinniú a tharraingt suas.
2. Féadfaidh ceachtar den dá pháirtí a iarraidh go n-áireofaí míreanna breise ar an gclár oibre. Tabharfar bunús cuí le haon iarraidh den sórt sin agus seolfar í i scríbhinn chuig an gcathaoirleach 7 lá féilire ar a laghad roimh an gcruinniú.
3. Glacfaidh an Comhchoiste an clár oibre ag tús an chruinnithe.

*Airteagal 8***Cruinnithe a réachtáil**

Áiríteoidh an cathaoirleach, le cúnaimh ó na rúnaithe, go gcuirfear na rialacha nós imeachta seo i bhfeidhm, réachtálfaidh sé cruinnithe agus stiúrfaidh sé na díospóireachtaí agus, an tráth céanna, áiríteoidh sé go bhfuil na díospóireachtaí struchtúrtha agus dírithe ar an ábhar. Tabharfaidh an cathaoirleach cead cainte do na cainteoirí san ord inar chuir siad in iúl gur mian leo labhairt agus féadfaidh sé a iarraidh ar chainteoir a bharúlacha nó a barúlacha a theorannú don ábhar atá á phlé.

*Airteagal 9***Meithleacha an Chomhchoiste**

1. Déanfar comhdhéanamh agus feidhmiú na meithleacha nó na ngrúpaí saineolaithe atá le bunú i gcomhréir le hAirteagal 29(4) den Chomhaontú a chomhaontú ar bhonn sainordú arna bhunú ag an gComhchoiste.

2. Cuirfidh na meithleacha nó na grúpaí saineolaithe na rialacha nós imeachta seo i bhfeidhm *mutatis mutandis*.
3. Déanfaidh na meithleacha nó na grúpaí saineolaithe a gcuid oibre faoi údarás an Chomhchoiste dá dtuairisceoidh siad tar éis gach ceann dá gcruinnithe. Níl na grúpaí sin údaraithe cinntí a dhéanamh, ach féadfaidh siad moltaí a chur faoi bhráid an Chomhchoiste.
4. Féadfaidh an Comhchoiste a chinneadh sainordú na meithleacha nó na ngrúpaí saineolaithe a leasú nó a fhoirceannadh.

Airteagal 10

Cinntí agus moltaí

1. Déanfar cinntí agus moltaí ón gComhchoiste trí chomhaontú frithpháirteach idir na páirtithe, i gcomhréir leis an gComhaontú. I dteidil na gcinntí agus na moltaí, luafar an focal 'Cinneadh' nó 'Moladh', de réir mar a bheidh, agus ina dhiaidh sin uimhir sheicheamhach, dáta glactha agus tagairt dá n-ábhar.
2. Síneoidh an cathaoirleach agus na rúnaithe cinntí agus moltaí an Chomhchoiste agus scaipfear ar na páirtithe iad.
3. Ar choinníoll go gcomhlíontar na rialacha rúndachta a leagtar amach in Airteagal 12, féadfaidh ceachtar den dá Pháirtí a chinneadh an cinneadh nó an moladh arna ghlacadh ag an gComhchoiste a fhoilsiú i gcomhréir lena rialacha féin. Cuirfidh na páirtithe a chéile ar an eolas faoin rún atá acu cinneadh nó moladh a fhoilsiú.
4. Féadfaidh an Comhchoiste a chinntí nó a mholtaí a ghlacadh trí nós imeachta i scríbhinn má chomhaontaíonn na páirtithe amhlaidh. Is éard a bheidh sa nós imeachta i scríbhinn malartú nótaí idir na rúnaithe, ag gníomhú dóibh i gcomhaontú leis na páirtithe. Chun na críche sin, tiolacfar téacs togra le haghaidh cinnidh nó le haghaidh moladh de bhun Airteagal 5, maidir le glacadh laistigh de teorainn ama nach lú ná 21 lá féilire, teorainn ama ina gcuirfear aon fhorchoimeádaí nó aon iarraidh ar leasuithe in iúl. Féadfaidh Cathaoirleach an teorainn ama sin a laghdú i gcomhairle leis na páirtithe, chun tosca faoi leith a chur san áireamh. A luaithe a chomhaontófar an téacs, síneoidh an cathaoirleach agus na rúnaithe an cinneadh nó an moladh.

Airteagal 11

Miontuairiscí

1. Déanfaidh an rúnaíocht dréacht-mhiontuairiscí ar gach cruinniú a tharraingt suas laistigh de 21 lá féilire ón gcruinniú sin. Léireofar sna dréacht-mhiontuairiscí sin na cinntí a rinneadh agus na moltaí a tarraingíodh suas. Cuirfear na dréacht-mhiontuairiscí faoi bhráid an Chomhchoiste lena ghlacadh.
2. Déanfar na dréacht-mhiontuairiscí a thíolacadh lena bhformheas ag an gComhchoiste trí nós imeachta i scríbhinn nó ag an gcéad chruinniú eile den Chomhchoiste. A luaithe a chomhaontóidh an Comhchoiste an téacs, síneoidh an cathaoirleach agus na rúnaithe na miontuairiscí.

Airteagal 12

Rúndacht

Nuair a chuirfidh páirtí faisnéis atá ainmnithe mar fhaisnéis rúnaicmithe nó íogair faoi bhráid an Chomhchoiste, déileálfadh an páirtí eile leis an bhfaisnéis dá réir. Ní dhéanfaidh na páirtithe faisnéis rúnaicmithe a mhalartú ach amháin má tá comhaontú tugtha i gcrích acu chuige sin. Féachfaidh siad le creat dlíthiúil cuimsitheach comhleanúnach a chur ar bun lena bhféadfar comhaontú den sórt sin a thabhairt i gcrích.

*Airteagal 13***Speansais**

1. Seasfaidh gach páirtí aon speansais a thabhoídh sé a bhaineann lena rannpháirtíocht i gcruinnithe an Chomhchoiste agus i gcruinnithe na meithleacha nó na ngrúpaí saineolaithe.
2. Tiocfaidh an Comhchoiste ar chomhaontú maidir le comhroinnt na speansas a bhaineann le haon mhisean a shanntar do shaineolaithe.
3. Is é an páirtí a bheidh ina óstach ar an gcruinniú a sheasfaidh an caiteachas i ndáil le cruinnithe a eagrú agus doiciméid a atáirgeadh.

*Airteagal 14***Comhfhreagras**

Seolfar gach comhfhreagras chuig cathaoirleach an Chomhchoiste nó ó chathaoirleach an Chomhchoiste chuig Rúnaíocht an Chomhchoiste.

*Airteagal 15***Leasuithe ar na Rialacha Nós Imeachta**

Féadfar na rialacha nós imeachta seo a leasú le cinneadh ón gComhchoiste arna ghlacadh i gcomhréir le hAirteagal 10.

*Airteagal 16***Teacht i bhfeidhm**

Tiocfaidh na Rialacha Nós Imeachta seo i bhfeidhm ar dháta a sínithe.
